



9. Tschanteda dal cussagl cumünel in marculli, ils 1.5.2013 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Ines Barblan, Gian Fadri Largiadèr, Paolo Bernasconi

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.210 Salzgeber Joos Simon, dumanda per attach lingia s-chudamaint baselgia S-chanf
4. 6.200 Hotel In Lain Cadonau, dumanda per mner tres ün event cun veiculs sül territori cumünel
5. 0.210 Salzgeber Joos Simon, contrat da servitut per lingias dal s-chudamaint a distanza, parcella nr. 41, 101, 114
6. 0.700 Decisiun da princip, adöver futur dal büro ex-posta
7. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 24.04.2013 vain approvu unanimamaing.

63 0.211 Dumanda da fabrica Keusch Michèle, orientaziun serragl per chauns

Il cussagl piglia cugnuschentscha da l'orientaziun da Michèle Keusch chi voul eriger ün serragl per chauns sün parcella nr. 513 in Nandet. Tenor sclarimaints cun l'uffizi chantunel per planisaziun nu fo que dabsögn d'üna procedura da fabrica per quist intent. Il cussagl nun ho üngünas ulteriuras objecziuns.

64 0.211 Dumanda da fabrica Campell Duri, nouva rait a queders per schinager il terrain

Il cussagl piglia cugnuschentscha da l'orientaziun da Duri Campell chi voul eriger üna nouva rait a queders per schinager il terrain tal serragl dals chavals sün parcella nr. 372 a Chapella. Tenor sclarimaints cun l'uffizi chantunel per planisaziun nu fo que n'eir tar quist intent dabsögn d'üna procedura da fabrica. Il cussagl nun ho üngünas ulteriuras objecziuns.

65 3.900 Baselgia
Salzgeber Joos Simon, dumanda per attach lingia s-chudamaint
baselgia S-chanf

Il cussagl piglia cugnuschentscha da la dumanda dal cussagl da la corporaziun evangelica scu eir la proposta dal contrat da Joos Simon Salzgeber per ün attach dal s-chudamaint provisioric vi da la baselgia. Siand cha la vschinauncha peja il quint per la forz'electric per s-chuder la baselgia, ho il cussagl da baselgia, chi nun ho dal rest üngün interess da fer las investiziuns, surdo la dumanda al cussagl cumünel per piglier pusizien. Our dal motiv cha la corporaziun evangelica es respunsabla per las investiziuns in baselgia, decida il cussagl da na tratter quista dumanda.

66 6.200 Vias e piazzas cumünelas
Hotel In Lain Cadonau, dumanda per mner tres ün event cun
veiculs sül territori cumünel

Il cussagl piglia cugnuschentscha da la dumanda da l'Hotel In Lain Cadonau da Brail, per pudair mner tres ün event da veiculs (jeeps) sün noss territori cumünel ils 24 avuost 2013. Ils 10 fin 15 veiculs faun üna tura sün las vias laterelas da Plaun Spinatsch - Flin - Val Flin fin Zernez ed inavous sur la via chantunela a Susauna. Da Susauna - Pignaint - Alp Funtauna, lo es previs da fer ün picnic. Las vschinaunchas da Zuoz e Zernez haun già concess il permiss correspondent. Il cussagl decida unanimamaing da pussibiliter da mner tres l'evenimaint sün noss territori cun differentas cundiziuns.

67 0.210 Contrats e cunvegnas
Salzgeber Joos Simon, contrat da servitut per lingias dal
s-chudamaint a distanza, parcella nr. 41, 101, 114

Il cussagl piglia cugnuschentscha dal contrat da servitut per la lingia dal s-chudamaint a distanza cun Joos Simon Salzgeber regard las parcelas nr. 41, 101 e 114. Il cussagl decida unanimamaing da propuoner a la prosma radunanza d'accepter il contrat da servitut scu preschanto.

68 0.200 Administraziun cumünela
Decisiun da princip, adöver futur dal büro ex-posta

Il cussagl vain infurmo chi nu sun entredas annunzchas per fitter il local ex-posta. Cun que es da decider sur da l'utilisaziun futura da quel. L'administraziun cumünela, specielmaing il fnestrigl es mel accessibel per impediens, attempos e charrozzinas, cun que füss avauntmaun il bsögn da druver il büro ex-posta scu büro cumünel. Daspö cha'ls büros sun gniesu fabrichos da l'an 1988 ho que do ün augmoint da la cifra d'abitants d'arduond 1/3. Causa quel augmoint nu s'ho pü piazza per las actas da la controlla d'abitants, d'impostas e las actas dals dischoccupos. Tenor prescripziuns chantunelas staun las actas gnir deponedas sgür, que chi nu po pel mumaint gnir garantieu. Impü, schi's voul spordscher eir in avegnir üna piazza da giarsunedi, es inevitabel d'ingrandir il büro, siand cha las cundiziuns da lavurer pel giarsun nu sun pü cunfuormas al temp d'hoz. Il cussagl decida unanimamaing da prevzair da nüzzer il local ex-posta scu büro e fnestrigl da la controlla d'abitants, da l'uffizi d'impostas, da l'uffizi da lavur scu eir da l'uffizi d'esters. In ün prüm pass dess ün planiseder da büros u ün student da la scoula IBV da Cuira elavurer propostas regard üna gestiun practica futura da l'administraziun cumünela.

69 9.999 Varia

Il president infurmescha sur da la charta chi'd es entreda da l'uffizi per il svilup dal territori chantunel Grischun regard la revaisa totela da la planisaziun locala. L'uffizi orientescha, cha las actas sun in circulaziun tals differentis uffizis chantunels e cha'l cussagl possa fer

quint cha la decisiun da la Regenza vain tratta probabelmaing dūraunt il mais avuost 2013.

Inavaunt infurmescha'l sur da l'annunzcha a la Swissgrid e la Repower tres il cumün da Zernez sur da l'intenziun da realiser ün implaunt idraulic pitschen in Punt'Ota, sül territori da Zernez.

Il cussagl piglia cugnuschentscha dal permiss dal departamaint da güstia, sgürezza e sandet per mner tres la cuorsa "ewz- Alpen-Challenge 2013", chi passa traunter oter eir tres nos territori cumünel e chi ho lö ils 17 e 18 avuost 2013.

Il president infurmescha, cha la Repower ho oriento sur dals cuosts d'investiziuns ch'els haun previs in connex cul schlargiamaint da l'infrastructura Chauntaluf/Foura Chagnöls. L'orientaziun es gnida fatta causa las trattativas per surpiglier la rait electrica.

A las 21.55 vain la tschanteda alveda.

In buna fè

L'actuar:

D. Schwenninger